

UN ELEMENT FONDAMENTÂL DAL MOVIMENT AUTONOMISTIC

Un tâl Vigj Bisiol di Pordenon, che daûr l'estri al à di jessi un avocat - chest al è il cuart d'ore dai avocats: cui varès mai pensât, che inte cuiete laboriose dai "vincj agns" de ditature si clucìs e al madressès un tesaur di esperiencis e competencis politichis cussì formidabil, tra lis pagjinis dai Codis riformâts e i cartolârs des causis in istrutorie? - duncje chest Bisiol, *pensoso* ancje lui, se Diu vûl, dal destin de Patrie grande e de sante Unitât, al declare che la cuestion des autonomiis e je malmadure e che il dismovile in chest moment e je stade une cjosse pericolose, imprudent e artificiose; che la soluzion e à di vignî jù dal alt, da un "at legjislatîf" e Diu nus vuardi dal fevelâ di soluzions plebissitariis, che al ven a stâi da un referendum popolâr.

Al dîs il Bisiol che il moviment autonomistic furlan al è vignût sù parsore di fundamentis storichis e glotologjichis e che bisugnarès tornâ a ridusilu dentri i confins di une dissertazion par int sielte e par filolics.

Vino di contentâlu? E je nestre "prassi" di dâ reson plui che o podìn ai nestrìs avversaris, parcè che a capissin - se al è pussibil - cetant pocje che a'nd àn.

Ma si: fevelin di glotologjie. E alore, lassant de bande par intant la storie che a cheste ore e je avonde cognossude dal public, o butarin dôs gotis di ingjustri sul cont dal "*fattore linguistico*" che Bisiol justementri al riten un fundament de cuestion, e che noaltris o ritignìn in mò plui fundamentâl di lui. Anzit o savìn cetantis voltis, inte storie dai popui, che al à bastât di bessôl a dismovi e a risolvi tremendis cuestions publichis, ancje in plen contrast cu lis condizions storichis e economichis.

La lenghe e je l'indicazion dal temperament, des iclinazions, des risorsis, des fuarcis e des debolecis, dai orientaments, des pussibilitâts di assorbiment e di resistance di un popul, e je il spieli coletîf, sigûr, sancîr, de anime di une coletivitât, e je ancje, voie e no, il termometri de purece e de prevalence fisiologjiche di une raze; e je la confession involontarie e incussient de indipendence spirituâl, de energjie endogjine, de personalitât e de fisionomie morâl, dal pont di evoluzion civîl, e dai difiets, des mancjancis, dai misclçaments, dai vizis, de decjadence, de tristerie, de coruzion di un ambient. La lenghe si ferme e e cjamine, si slargje e si streng, si manten e si coromp, si conserve e si cambie, e vîf e e mûr secontri che si ferme o che al va indenand,

che e si slargje e che si strenç, che al si manten san o che al fraidès, che al dure o che al si mude, che al vîf o che al mûr un popul.

La malevite e sint, e simpri e à sintût, la dibisugne prepotente di rineâ il lengaç des personis normâls e di creâsi un "zergo" nome par so cont. La filosofie e la sience, jentradis intune profunditât di cuestions indulà che la fole no rive, a scugnin creâsi un lôr lengaç particolâr, la poesie jevantsi a svolâ parsore il nivel usuâl de realtât ordenarie e stupide, e cjante in tiermins e formis che a cuistin significât e valôr e musicalitât gnovis, che tancj di lôr no puedin capî.

La lenghe in sumis e je la spie fedêl di dute l'anime, sedi di une persone, come di un popul.

Fintremai che un popul, cun ducj i rapuarts voluntariis o no cui sie vicinants, al manten la sô lenghe, al è segn che nol à pierdude la sô personalitât, che no si è messedât, che no si è bastardât, che nol à rineât se stes.

Nol jere stupit il guvier fassist, unitari par ecelence, a fâ di dut par scjafoiâ il furlan: stupits a son chei che a crodin di scjafoiâ il moviment autonomist ridusintlu a une cuestion filologjiche. Scjafoiâit la lenghe e o sês a bon. Pordenon al insegne. Nissune altre fuarce, nissune reson, ni storiche, ni economiche, ni culturâl, ni folcloristiche e valarà tant a tignî vive la personalitât dal popul furlan come la lenghe. Tant che intai diviers Cjantons de Svizare, come tal Sud Tirôl, come inte Sclavanie, fintremai che e vîf la lenghe e vîf l'anime di un popul, e chel popul nol è inmò madûr par nissune unificazion. Altri che cjararis di filolics!

E par cheste reson, noaltris autonomiscj di ponte, cun dutis lis dificultâts che o viodevin e che ogni dì inmò o scugnin superâ, o vîn volût un sfuei inte nestre lenghe da cjâf a pîs, e o vîn ancje risiervade une part impuartante aes cuestions filologjichis; e si lambichin il çurviel par coltivâ e disberdeâ fûr dal so andament dialetâl, il lengaç furlan.

josef marchet - Patrie dal Friûl - 1946